

समे — 12:25

<><><><><>

एह आकाशवाणी जम्मू ऐ, हुन तुस जगमोहन शर्मा कोला खबरां सुनो।

India China

विदेश मंत्री सुब्रह्मण्यम जयशंकर होरें आखेआ ऐ जे भारत ते चीन ब'रे 2020 च गलवान घाटी च होई दिएं झड़फे करी खराब होए दे सरबंघें गी सुधारने दी कोशश करै करदे न। उ'नें आखेआ जे सरबंघें च तनोतनी कन्नै कुसै बी पक्ख गी लाह नेई होग। डॉक्टर जयशंकर होरें आखेआ जे मतभेद, विवाद नेई बनने चाईदे ते मुकाबलेबाजी, संघर्ष आली स्थिति पैदा नेई होनी चाईदी। उ'नें नमीं दिल्ली च कल एशिया सोसाइटी दे अध्यक्ष ते मुख्य कार्यकारी अधिकारी क्युंग-व्हा कांग हुंदे कन्नै भारत-चीन सरबंघें पर गल्लबात च एह गल्ल आखी। डॉक्टर जयशंकर होरें आखेआ जे पिछले ब'रे अक्तूबर थमां दौनें मुखें बश्कार सरबंघें च किश सुधार होआ ऐ ते दवै मुख्य, अपने सरबंघें दे बक्ख-बक्ख पैह्लुएं पर कम्म करै करदे न। उ'नें आखेआ जे भारत ते चीन अपने सरबंघें गी परतियै सुधारने दे जतन करै करदे न।

<><><><><>

India-UN

भारत आस्सेआ बाल मृत्यु दर गी घट्ट करने लेई कीते जा'रदे जतनें दी संयुक्त राष्ट्र च बी सिफ्त होआ करदी ऐ। इस बारे संयुक्त राष्ट्र दी इक रिपोर्ट च आयुष्मान भारत कार्यक्रम दा बी चेचा तौरा पर जिक्र कीता गेदा ऐ। जेहदे तैहत भारत च सेहत बवस्था च मता सुधार दिखने च लब्धा करदा ऐ। रिपोर्ट मूजब सन् 2000 दे बाद भारत च 5एं ब'रे कोला हेठली उमरी दे बच्चे दी मौत दे आंकड़े च 70 प्रतिशत दी कमी दर्ज कीती गई ऐ।

<><><><><>

Kathua Encounter

कठुआ जिले च आतंकवादिएं ते सुरक्षाबलें बश्कार इक ताजा टाकरा भखी पेदा ऐ। आकाशवाणी दे जम्मू संवाददाता नै जानकारी दित्ती ऐ जे जिले दे राज बाग इलाके दे घाटी जुथाना थाहर किश आतंकवादिएं दे दिक्खे जाने दे बाद एह कारवाई शुरू होई। पिछले 4 दिनें थमां जिले च आतंकवादिएं दी तुपाई लेई इक अभियान पैहले गै चलाया जा'रदा ऐ ते मन्नेआ जा'रदा ऐ जे एह उयै आतंकवादी होई सकदे न जेहड़े जिले दे हीरानगर सेक्टर दे सनेयाल ग्रां च टाकरे दरान नस्सी गेदे हे। ताजा जानकारी मूजब टाकरा जारी ऐ ते सुरक्षाबलें दी होर नफरी उत्थें भेजी दित्ती गई ऐ। होर ब्योरे गी बलगेआ जा करदा ऐ।

<><><><><>

Accident NHW

बनिहाल ते काजीकुंड बश्कार बनी दी नवयुग टनल दे अंदर कल संजा इक यात्री बस दे हादसे दा शकार होई जाने करी घट्टोघट्ट 12एं लोकें दे जख्मी होने दी खबर ऐ। एह बस जम्मू थमां श्रीनगर जा'रदी ही। घायलें गी तुरत नेड़े दे अस्पताल पजाया गेआ जिंदे चा 5एं गी सरकारी मैडिकल कालेज अनंतनाग मुंतकिल करी दित्ता गेआ ऐ।

<><><><><><>

National Farming

उधमपुर जिले च देसी तरीके नै राई-बाई करने दी सिखलाई देने लेई लोआए गेदा 5 रोजा कैप कामयाबी कन्नै समपन होई गेआ। कुदरती राई-बाई बारे राष्ट्रीय मिशन तैहत् लोआए गेदे इस कैप दरान कृषि सखिएं गी पर्यावरण दे दे अनुकूल ढंग तरीके अपनाइयै खेती बाड़ी दे बारे च जानकारी ते सिखलाई दित्ती गई। समापन समारोह च मुख राई-बाई अफसर संजय आनंद होरें कैप च सिखलाई हासल करने आलिएँ “कृषि सखिएँ” गी प्रमाण पत्र भेंट कीते।

<><><><><><>

Krish Sakhi Ramban

ठीक इस चाल्ली दा इक कैप रामबन जिले दे कृषि विज्ञान केन्द्र धलवास च बी लोआया गेआ। 5एं दिनें दे इस कैप च 12 कृषि सखिएँ सिखलाई हासल कीती। इनें कैपें च सिखलाई हासल करने आलियां कृषि सखियां नां छड़ा आपू इनें पद्धतिएँ गी अपनाइयै बेहतर ढंगे नै कम्म करी सकगन सगुआं होरनें गी बी कुदरती ते देसी तरीके नै खेती करसानी करने लेई प्रेरत करी सकगन।

<><><><><><>

SANKALP Kathua

हुनर विकास ते रोजगार सृजन आली भेठा इक बड़्डी पैहल तैहत् कडुआ दे डिप्टी कमीशनर डॉ. राकेश मिन्हास होरें कल संकल्प स्कीम तैहत् 25 लाभार्थिएँ गी नियुक्ति सरबन्धी पत्र सौंपे। लाभार्थिएँ गी उद्योगें कारखानें च लोडचदी माहिराना सिखलाई कन्ने लैस कीता गेआ ऐ। संकल्प स्कीम दा मकसद हुनर विकास, लोडचदी सिखलाई ते इंटरशिप आली सुविधा उपलब्ध करोआना ऐ। इस मौके पर बोलदे होई डॉ. मिन्हास होरें हुनरमंद लोकें गी बढ़ावा देने ते युवाएं गी सिखलाई हासल कराने पर जोर पाया। उनें कडुआ जिले च बघा'रदे उद्योग सरबन्धी संभावनाएं ते उपलब्ध मौकें गी उजागर कीता ते युवाएं गी पेशेवराना हुनर सिखने पर जोर पाया। उनें आखेआ जे हुनरमंद होइयै युवा रोजगार हासल करी सकदे न।

<><><><><><>

Rajouri Review-Meet

राजौरी दे डिप्टी कमीशनर अभिषेक शर्मा होरें इक बैठक दरान केन्द्र प्रायोजित स्कीमें जियां सेंट्रल रोड फंड, समग्र शिक्षा, स्कूल च दपैहरी दी रूट्टी आली स्कीम मिड-डे मील, पी.एम.श्री स्कूल, बेटी बचाओ बेटी पढ़ाओ, बन्ने आले इलाकें दे विकास सरबन्धी प्रोग्राम बगैरा दा जायजा लैता। उनें प्रोजेक्टें दी समें सिर अमलावरी, उंदी कारकरदगी ते उपलब्ध फंडे दा सेई इस्तेमाल करने पर जोर पाया। उनें कम्में दे म्यार च पारदर्शिता ते म्यार गी बनाई रखने लेई गलाया। डिप्टी कमीशनर होरें सारे मैहकमें गी हिदायत कीती जे ओह नियमित तौर पर प्रगति रिपोर्ट जमा करोआन। लोकें दी भलाई बेहतरी आली स्कीमें दी अमलावरी समेंबद्ध ढंगे सिर करने पर बी उनें जोर पाया तां जे सारे कम्मे समें सिर सबूरे होइ सकन ते लोकें गी एह्दे थमां लाह हासल होई सकै।

<><><><><><>